

اِسْتِغْنَا

۴ تشرین اول ۱۳۲۴

جمعه ایرتسی

نومرو ۵

۱۵ نجی ماده — مستعجل طوتملسنه هیئت عمومیه ده قرار ویریلان مواد مستثنالوق اوزره شعبه‌لره حواله اولنان لایحه و اوراقک مذاکره‌سنه یوم توزیعدن برکون صکره باشلانیهیلور». شعبه‌لرک مقدار اعضالری مبعوثانک نسبتنه کوره یتمش سکر اعضادن مرکب اوله‌جفی محتمل اولدیغندن بو قدر ذانک اسامیسنی ومذاکرات واقعه‌ینی ضبط ایتمک برقاچ کاتبک کاری اولسه کرکدر شعبه‌لره اوراق هیئت عمومیه دن توزیع اولنه‌جفی منظم اولمقده وشعبه ده هیئت عمومیه‌نک وظیفه و تدقیقاتی تسهیل مقصدیه مشکل اوله‌جق‌لری بدیهی بولمقده در.

مکتب حقوق مأذونلرندن

مختار کمال

علوم حقوقیه مذاکره‌لری

۳

sursis امهال مجرمین (*)

۱۸۹۱ سنه‌سی مارتنک یکریمی آلتنجی کونی فرانسه‌ده مجلس مبعوثانده، مجلس اعیانده تصویب اولنان بر قانوندن، برانزه قانونندن بحث اولنیور ایدی. برانزه ۱۸۸۴ سنه‌سندنبرو قوه‌دن فعله چیقارمق ایستدیکی بوقانونی عمومک آلیش‌لری تحسین‌لری آره‌سنده، مملکتته، عالم انسانیت بر مثال اجتماعی اولمق اوزره اتحاف ایلنیور ایدی. برانزه مجلس اعیانده فذلکه مأموری ایکن موسیو بارتو مبعوثانده تلخیصی وظیفه‌سنی ایفا ایدیور ایدی. یدی‌سنه علی‌التوالی بذل‌ایستدیکی هم‌تک محصولی اولان برانزه قانونی، وقائع جناثیه‌نک، جریمه تکررک تکثرینه قارشو بر تدبیر اخلاقیدن بحث ایتمکده ایدی یعنی ایلمک دفعه ایقاع جرم ایلان بر شخصک، خطا، جهلاً هر نه دینسه جرأت ایلدیکی فعلدن، مؤاخذه و عتابی بر مدت موقته ایچون تعویق و امهال طلبنده بولنیور ایدی. دیمک اولیورکه

(*) معصومینه تضمینات ۱ ژوری ۲ امهال مجرمین ۳

برائزه قانونسده مجرم مبتدیلر ایله مجرم مکررلر آره سنده بر فرق ملاحظه ایدیلرک نظریات بو اصله بنا اولمشدر.

راز تأمل اولنور ایسه بر آدمک بلاجنجه، بلاقباحت قرق، الی آتمش سنه هیئت اجتماعیه آره سنده امرار حیات ایلدکدن صکره لسببر ضرب، یاخود تحقیر کبی آتی، استثنائی بر تجاوزه متجاسر اولمسندنطولای درحال مجازات لایقه سی ترتیب ایلدکده هر حاله بیوک بر اثر استعجال اظهار واثبات ایدلمش اولور. چونکه مظلونک سوابق احوالی، لهنده حجتدر.

امهال مجرمین قضیه سنده فرانسه ایله انکلترده آری آری اصولر تعقیب اولمشدر. فرانسه بلجیقا اصولی محکومیتک تطبیقه امهالی، انکلتزه و امریقا اصولی حکم و محاکمه ک علی الاطلاق تعویفی ترویج ایلمکده در. بو اصوللارک وضع و تأسیسندن و بالتیجه حصوله کتوریان تدابیر اخلاقیه و اصلاح ناس مسئله سنک توضیحات و تشریحاتدن اول بو جهتی ایضاح ایده رزکه اقوام سالفه، بر مجرمک قباح و کناهی، ذات و شخصنده کوردیکی اوصاف لایقه حسیه جزادن موقه عفو ایدر ایدی. از جمله ۱۷۱۲ - ۱۷۱۳ سنه لرله انی متعاقب سنه لرده، مجارستانده بعض تعامل بلدییه جاری ایدی. موضوع مذکورک بر صفحه جدیدته کیرمیسی اولا روما صکره پترسبورغ قونفره لرنده حاصل اوله بیلمشدر. تعویق حکم و امهال مجرمین مسئله معتسبهاسنی، قانون شکلنده، نظام طرزنده نشر و اعلان ایلان اک برنجی حکومت؛ متری و چالیشقان قوم، بلجیقایلر در.

[۳۱ مایس سنه ۱۸۸۸].

فرانسه و بلجیقا - انکلتزه و امریقا: اصولر لرنده مشاهده اولنان فرق برنده مجرم مبتدینک مجازاتی یا محکومیتنی تطبیقه تأخیر و امهال، دیکرنده تعقیباتدن صکره محاکماتی تعویق یولنه کیتمکدن عبارتدر. فقط اساسه رجوع ایدرایسه ک ایکسینکده متحد، ایکسینکده مشارک بر اصله بر قاعده یه تابع اولدیفنی کوریرز. مقصد ندر؟ مقصد مجرم مبتدیلره؛ صلاحیت قضاجه بر مساعده فوق العاده اعطا و مجازاتلرینی، بر مدت؛ تجربه مدتنده تقشش ایلیمک و فاصله انتظارده

مجرم مبتدی به اسباب ابتناء و صلاحی دوشندرمك اولوب قضیه معکوسه حاصل اولدینی تقدیرده یعنی جرم ثانی ارتکاب اولندینی عقبنده تکرر جرم قاعده‌سنه رعایتله جزایی تشدید ایده بيلمك مقصیدر .

امهال مجرمینك له وعلیهنده اداره کلام ایدنلر عصر مزده چوغالیدی. لهنده اداره کلام ایدن برانزه‌لر، امریقالیلر، بواسولده مجرم‌لره صلاح حال موعوددر دیورلر. معترضلر ایسه؛ ایلك جرمندن جزایه گرفتار اولمیه جفنی اکلایان هر سفیل و بدبخت مخلوقك استفاده‌سنه مساعد اولان بو قاعده‌نك مضراتندن بحث و اداره کلام ایتدکن صکره بو قاعده مجرمینی بیانی تشویق و ترغیب ایلور دیورلر. میدانه حیقاچ حقایق شبه‌سزدرکه ایکی فرقه ارباسندن برینك دعواسنه برهان تشکیل ایده‌جکدر .

امهال مجرمینك شرائطی

فرانسه، انکلتزه قوانین عدلیه‌سنه داخل اولان تعویق حکم، امهال مجرمین اصولنه عمومیتله بالشرط محکومیت *Condamnation Conditionnelle* اطلاق اولنور. بالشرط محکومیتك مواقع تطبیقیه‌سی مجرمده، جرمده مجازآده اولق اوزره اوج مجلده جمع ایدیله‌یلور. فی الواقع تفصیلات آتیه اثبات ایده‌جکدرکه فاعل جرمك ذات شخصی، جرمك ماهیت و اساسی و مجازاتك نوع و درجه‌سی اعتباریله قوانین عدلیه بعض اشخاصی، بعض جرائمی، بعض مجازاتی امهالدن، حکمجه تعویقندن استثنایلمشدر .

فرانسه قانوننه کوره امهال مجرمین ایچون درت قاعده کلیه و اساسیه حادث اولور. برنجیسی: امهال اصولی، جنایت و جنحه‌دن طولانی سابقه‌سی، محبوسیتی اولمیان، حاصل حقوق عمومیه‌نامه تعقیب و حریت شخصی‌سی موقه یامؤبداً رفع و تقیید اولنمیان مجرم مبتدیلره مخصوصدر .

ایکنجیسی: جرائم عسکریه و قباحث افعالنندن ماعدا ماهیتی هر نه اولور ایسه اولسون بالجله جرائم حقنده تطبیق اولنور. اوچنجیسی: انواع مجازات

قانونیه‌دن بالکتر حبس و جزای نقدیلر حقنده جاری اولور. دردنجیسی: بری و بحری دیوان حربلر مستئنا اولمق اوزره محاکم مؤسسەنک کافەسەنک صلاحیتی داخلندە در.

۱ — فاعل جرمه یعنی برنجی قاعدیه نظراً تدویر ملاحظه ایلر ایسەنک تفصیلات و ایضاحاتی نظریات و حکمت جزایه توفیقاً توسیع ایلمککمز لازمکیلر. مثلاً مظلونک سابقده بر اجنبی دولت محکمه‌سندن، محکومیت و محبوسیتی موجود اولسە نظریات جزایه‌جه بوکا نه دینلمک ایجاب ایدر؟ قواعد کلیه‌یه اتباعاً هر دولتک قانونی کندو حدودی داخلندە جریان ایدە جکندن محکومیت سابقه مذکوره غیر وارد و حتی غیر واقع حکمنه کیرر دیمک اقتضا ایدر. محاکم محلیه‌نک تبعه حقنده اصدار ایلیه جکلری حکملرده بتون بتون قیوددن ازاده اوله‌مامشدر. محکومیت سابقه دنیلان شی: محکومیت قطعیه سابقه [قضیه محکمه (chose jugée)] در. محکومیت قطعیه وارد اولدینی بر زمانده مجرمک بر ایکنجی جرمی، قباحتی، ظهوره کلور ایسە هر ایکی جرمک بهمە حال جرائم مجتمعه قواعدینه تبعاً جمع و توحیدی و اعظمک ترتیب جزایی لازمکله جکی کبی امهال مجرمین قاعدەسی دخی بلا شرط و قید هر ایکی فعل حقنده جاری اولمق لازمکیلر. عفو عمومی، اعاده محاکمه، اعاده حقوق ممنوعه، جرائم سابقه‌یی اساسندن قع و استیصال ایلیه جکندن اقدجه محکوم اولوب بالاخره وسائط معروضه ایله معاف حکمنده طوتیلان محکومیتلر، محکومیت قطعیه سابقه‌دن معدود اوله‌میە جفندن امهال جائز اولور.

ایضاحات واقعه‌دن اکلاشیلیورکه علیهنده محاکم اجنبیه‌دن حکم صادر اولان بر شخصک مملکتنده مترتب اولدینی جرمندنائی عندالحاکمه امهال و مساعده‌دن حق استفاده‌سی زائل اولمز. چونکه حکم سابق محاکم اجنبیه‌دن صادر اولدیغندن حکمسزدر. تبعه‌دن بر کسه دردست محاکمه اولان جرمه حکم قطعی و نهائی صادر اولدینی حالده ثانیاً ارتکاب ایلدیکی جرم ایچون اجتماع جرائم قاعدەسی تطبیق اولنه جفندن بو وقعه‌ده دخی امهال قاعدەسی تجویز اولنور.

عنو عمومی، اعاده محاکمه، اعاده حقوق متنوعه جرائمی؛ ضایع اولان حقوق، اعاده و وقایع سابقه بی حادث اولماش منزله سنه ایصال ایلدیکندن بویولده مظهر تسبیلات اولان کسه لر بالاخره ابتدائی جرم لر ندر نطولای امهال قاعده سنندن استفاده ایدر لر.

۲ — محکومیت سابقه دائماً حبس ویا اندن آغر بر جزا اولدینی زمانلرده تکرر جرم ثابت اولور. فقط محکومیت سابقه مجازات نقدیه دن عبارت اولدینی صورتده مقداری نه قدر اعظم اولور ایسه اولسون حبس کبی مجازات جسمانیسه و بدنییه ایله قابل توازن اولیه جق مرتبه دهه خفیف، مالی بر جزا اولدینی جهتنه ثانیاً ارتکاب اولنه جق حبسی مستلزم بر جرم هر حالده امهال مجرمین قاعده سننه تابع اولور.

جرائم عسکریه و سیاسییه، یعنی جرائم خصوصیه دن بعضیلری حقننده علماء اتفاق ایدمه ریک ایکی فرقه یه آیرلمشدر. بعض علماء پولتیقه و عسکری جرم لرینی اهمیتجه ایلوو طوته رق و ده ها طوغریسی جرائم صیدیه و اورمانلره متعلق نظام سنر قطعیات ویا سار جرائم عادییه ایله قیاس اولنمه جق مرتبه بعض اشکال و ظروفی جامع اولمق اوزره نظر مطالعه یه آلهرق عسکری و سیاسی جرائمده امهال مجرمین قاعده سنی قبول ایتمکده ایسه لرده. بعض علماء و حکماء معروقه، جرمک نوعی نه اولور ایسه اولسون، جرائم ابتدائییه احتیاجنک مجرمیتی سیاسته یا عسکرلکه تعلق ایتمش اولمقله کندو صفتنک مجرم مبتدیلکنندن چیقمسی لازمکلمیه جکی کبی امهال و تعویق حکم شرفندن، محرومیتی دخی استلزام ایلمز ملاحظه سیله جرائم مذکوره اربابنک حصه استفاده لرینی تشویق و ترغیب ایلمکده بولمشدر.

حکمت جزاجه جرم ابتداینک ماهیتی نه اولور ایسه اولسون قواعد اربعه مسبوقیه، و شرائط مساعده کارانه قانونیه یه توفیقاً هر جرم ایچون ترتیب اولنه جق جزانک امهالی جائزدر.

۳ — مجازاتک امهالی بحثنده استعانه اولنان شو قاعده نک ایکی مستثناسی

وارد بری قباخته، دیگری عسکر لکه تعلق ایدن جرائمك مجازاتیسدر. قاعده نظریه جه امهال، اصلاح حال، و تهذیب اخلاق اوغرندنه اتخاذ اولمش برمساحه قانونیه اولنجه، حکام، قننی جرم وهانکی جزا اولور ایسه اولسون، جرائم سیاسییه یا عادیهدن، جرائم خصوصیه یا عمومیهدن اولدیغنه احاله اعتبار واهمیت ایلمیهرك هر دعواده، هر حکمده وهر مجازاتده امهال قاعدهسنی، تنسیب واختیارده مستقل، ومقتدر اولسی ایجاب ایدر. ایشه نظریاتك بواطلاق واختیاری بعض مشکلاتی، آئیده بیان اولنه حق مهمجه برطاقم اعتراضات وموانعی دعوت ایلمشدر.

اولاً: حقوق مدنیهدن اسقاط جزا سیله برابر جنایاتده حکم اولسان محبوسیت - که قانون جزای عثمانیده محل تطبیق بیان اولنیهرق یالکزجه ذکر اولمشدر - مادهسی ایچون جنایاته مخصوص بر حبس اولق حیثیتله امهال جائز دکلدرد. ضابطهسی احداث اولنیور و بوکا سبب اولهرق حقوق مدنیهدن اسقاط جزاسنك فرعی اولدینی اراهه ایدیلور. حالبوکه محبوسیت جنایاتده مجازات فرعیهدن اولق اوزره ترتیب ایدلمش اولمقله برابر امهال Sursis صلاحیتدن خارجده قلمسنی مستلزم اولهحق، بر شکل آخره، بر شکل دیگره منقلب اولنیور. اکر بو صورت مستثنا بر حال اولق اوزره کوسرتلك ایستیلور ایسه بوکا مماثل اولان وقوعاتلرده بر تدبیر کرکدر. فرضا جنایتله مهم اولان بر شخصك محکومیتی اسباب مخففه ورودیله حبسه وتضمینات نقدیهیه تنزیل ایدلمش بولنسه، حال اوله قیاساً بومستلهدده دخی امهال جائز اولماملی ایدی. حکمانك اتفاقه نظراً امهال مجرمین مادهسنك الکفسیح ساحه تطبیق وزمین انجلاسی ایشه بو حکمدر.

زیرا: مسائل قانونیهك بوکبی انواعنده اعتبار ادعایه دکل حکمدر.

ثانیاً: جرائم خصوصیهدن، رسوماته، اورمانلره تعلق ایدن جرائم اکثریا مجازات مالیه ایله محکومیتی ایجاب ایلدیکندن بعض مطالعاته کوره، تضمینات قیلندن اولق اوزره اخذ ایدیلنمکده اولان شو جزای تقدیرلر امهال و تأخیر اولنورسه خزینة دولت متضرر اولور، حالبوکه فوائد و منافع مستحصلیه باقیوبده نقصانی حاصلاتی نظر مطالعیه آتیق و امهال اصولنی رد و تقییح ایلمك موافق معدلت

اوله‌میه جنی کی الفت اجتماعیه اوغرنده تحصیل ایدن نتایج نافعہ و خیریه قارشوسنده شو ضرر لر، نقصانلر قاله آله‌جق شیردن دکدر.

ثالثاً: امهال مجرمین، جرائم عسکریه به حکم اصدار ایلان دیوان حربلرک قرارلری حقنده جاری اولمز. بو مسئله بر وظیفه و صلاحیت مسئله‌سیدر. شوبله که بین‌العساکر شوکت و مهابت، آلات و ادوات حربیه ایله برابر باعث مستقل ظفر اولان اطاعت، اطاعت عسکریه به محتاج و منقاددر. بو مقصدک حصولی امرنده، دیوان حربلرک قرارینسه لایتنیر و قطعی الحکم دنیلدی. هر دولنده، هر مملکتده بوبله‌در. استیناف اولمز. تمیز اولمز. بوقاعده به ابتداء عسکریدن بری، ایستر دیوان حربده محاکمه اولنسون، ایستر فوق‌العاده بر صورتله محاکم عادی‌ده محاکمه اولنسون، و ایستر ایسه قوانین جزائیة عسکریه به یا قوانین عدلیة نظامیه به توفیقاً محاکمه اولنسون علیهنده ویریلان حکم امهال قاعده‌سندن مستفید اولمز، خارج طوتیلور.

رابعاً: امهالی منع ایدن سبب اولجه جنجه و جنایاتدن بر فعلک ارتکابی سبق اتمش اولمقدر. کذلک تکرر جرمی احداث ایلان جزایی تشدید ایلان سبب ثانیاً جنجه و جنایاتدن بر فعلک ایقاعی ولی و تعاقب ایلمش اولمقدر. یالکر قباحت افغاندن حکمده سبقت ویا تکرر و تعاقب واقع اولسه بیله امهال مجرمین هر بر فعلده آیری آیری جاری اولور. چونکه تکرر جرم، واجتماع مجازات بختلرینک نظاریات و حکمت جزائیة‌سه شوبله باقیوبرایسه‌ک آنده قبایحک خفت وعدم احمیتی اعتباریله بعض استثنائی شیرلر یا بلمش اولدیغنی کوریرز. جرائم مجتمعه جزاسنده قباحت حکملری آیری آیری چکدیریلور. (اجتماع جزا). تکرر جرمده قباحت تکررلک ایچون سبب قوی تشکیل اتمز. زیرا: متخصصین علم، جنجه‌دن جنجه‌به، جنایتدن جنایت یا خود جنجه‌دن جنایت، جنایتدن جنجه‌به اولمق اوزره برندن صکره دیکرینک ارتکاب و ایقاعی تکرر جرمده اساس اتخاذ ایلمشدیر. قباحتدن ایسه اصلاً بحث اولنماشدیر. بوندن اکلاشیلور که قباحتده تکرر، اسباب مشدده قانونیه‌دن دکدر.

بو بحثه تعلق ایدن مسائل مهمه دن بری دخی امهالندن صکره نه قدر مدت انتظار ایتلیدرکه مظنون علیک متنبه اولدینی اگلاشیله بیلسون ؟ مهل انتباه قاعده مرور زمان مدته مساوی اولمیدر. بو مدت نظر فنده بر شخص کندو علیمنده ویرلمش اولان حکمدن متنبه اولمش ایسه مرور زمانه حکم سابق ساقط اوله رق جزانک عدم تطبیقندن انتظار اولان فائده اجتماعیه حاصل اولمش اولور. واکر حکم سابقدن موقه عفو اولندیغنک قدرینی، نعمتی بیلیمیه رک مظنون علیه ایکنجی بر جرم ایشله مش اولور ایسه، عفو سالفندن فائده مند اولدینی تبیین ایدرک مکدرلک قواعدینه رعایتله مجازات قانونیه سنده التزام مبالغه شرط اولور. مهل قانونی، جنجهلره مخصوص بش سنه مرور زماندر. قباحترلر حقنده امهالی تجویز ایلان و بیاخصه حبسی مستلزم اولان قباحترلره جنجهلره قیاساً تأخیر جزا طرفداری اولان حکما قباحترلر ایچون دخی ایکی سنه مدت تعیین ایدیورلر [بعدا الحکم مرور زمان].

خامساً: یوقایلرده بیان اولنشدیکه محکومیت مجازات مالیه انواعندن اولدینی تقدیرده مظنون علیه امهال و مساعدده دن مستفید اولور. فقط حبس حقنده هیچ واقع اولماش نظریله باقهرق مظنون علیک امهالی تجویز ایلمک بر درجه مناسب اولمز. چونکه حبسی مستلزم اولان وقعه جزای نقدی بی دعوت ایلین وقعه دن هر حالده اغردر. فرانسه قانوننک انهای تنظیمنده، جهت اخلاقیه کز زیاده کوز اوکنه کتیرلدیکنندن طولانی، جزای نقدی ایله اوغراشلمیه رق مقداری نه اولور ایسه اولسون حبس جزاسنک امهالنده اصرار اولنشدی. حبس جزاسنک مجرم مبتدیلردن امهال و تأخیریه شو یولده بر فائده حاصل اولیور که مظنون علیه جرم ابتدائی سببیه حبسخانهیه کیرمیور. حبسخانه احوالنه آیشمیور، سکانیه اختلاط ایتمیور.

بالاخره مجازات مالیه موضوع بحث اولمش و مجازات مالیه دن مقصدنه ایدوکی یعنی مجازات نقدیه، مجازات اولق اوزره ترتیب و حکم اولسان جزای تقدیلر اولدینی بیان اولنمشدر. بنابرین محکومیت مالیه انواعندن اولان تضمینات

شخصیه به ، مجازات انتباهیه به مخصوص جزای نقدیلر ومثلاً ، « استجوابنامه‌نك هر صحیفه‌سنی كاتبله مستعلق امضا ایده‌جكدر . ایتدیكى تقدیره كاتبدن ایكى لیرای عثمانی النور » كی جزالر ، واصلو مجا كه‌جه فرضا « مشكى حقسنر چیقیدینی تقدیره مشكى عنه ۲۵۰۰ غروش جزای نقدی اعطاسنه محكوم اولور . » منللو مجازات مالیلر بوصنفده داخل اوله‌مز . انحق اجله ارباب‌حقوقك اتهاقكر ده‌سی وجهله رسوماته اورمانلره ، طوغریدن طوغری‌یه‌النان ویركولره ، اوقتروابه متعلق جزای نقدیلر دولته عائد تضمینات مخصوصه‌دن اولملقه برابر مجازات قانونیه انواعنده اولدیقندن بومجازات مالیلر ایچون تأجیل وامهال صحیح اولوق لازمكلیر .

حبس مطلقاً حبس اولدیغه كوره امهال ، معذرنه ، اسباب برآته مبنی تخفیفاً حكم اولنان بالجله حبس جزالرینه شامل اولور . ازجله قاتل معذورك حبس جزاسی ، اون بش یاشنی اكمل ایتمیان چوجققلره اصلاح نفس ایچون حكم اولنان اون یالوچدن التی سنه‌یه‌قدر حبس جزالری بوصنفه داخلدر .

سادساً : امهاله صلاحیتی اولان محاكم عمومیه حبس ومجازات نقدیه‌دن برینه حكم ایدوب امهالی التزام ایلدیكى تقدیره یالكر حبسك برقاج ماهنی ، یاخود یالكر مجازات نقدیه‌نك برقاج غروشنی امهال ایده‌مز . یعنی قسمأ امهاله ، قسمأ اجرايه حكم ایده‌مز . مع هذا قانونك امری حبس جزا-سیله برلكده مجازات نقدیه‌یه حكم اولنحق مقتضیات قانونیه‌دن اولدیغی صورته محكمه حبس ومجازات نقدیه‌دن برینك اجرا-سنه ديكرینك امهاله قرار ویره‌یلور . زیرا : حبسك اجراسی ، مطالعات سابقه‌یه وتداییر اخلاقیه‌یه كوره مضرت آور اولنجه محكمه حبسی امهال ایدوب ، جزای نقدینك فی الحال اجراسنی طلب ایدر ایسه معقول حركت ایتمش اولور .

شمدی‌یه‌قدر قواعد اربعه‌دن مجرمه ، جرمه ، ومجازاته متعلق تفصیلاتدن بحث ایتدك . ختام مقاله موفق اولوق اوزره برارده امهاله صلاحیتدار اولان محكمه‌لردن بحث ایده‌جكر . قاعده‌كلیه اقتضاسنجه امهال مجرمین اصولی بلا

استثنا کافه محاکمه ، محاکم خصوصیه ، تجاریه ، بحریه ، حتی محاکم عالیده تطبیق
 و بو حق استعمال اولنه بیلملیدر . شو قدر که بیان ایتدی کمز وجه اوزره محاکم
 عسکریه بعض اسباب و ایجابات عسکریه بیه بناء امهال صلاحیتی استعمالدن منع
 ایدلشدیر . بو محکمه لک نظر اعتباره انه حق مهم و الزم احتیاجی ، عساکرک
 اطاعت و انضباطنه تعلق ایدن حکملرینک حلندن وقایه سی ماده معتنا ماسیدر .
 حکمه باقیلور : مجازات واقعه عسکریدن بری حقننده ، قوانین جزائیة عسکریه
 توفیقاً و رملش ایسه امهال بو حکمده جاری و نافذ اولمز . یوق افراد ناسدن بری
 حقننده حسب الایجاب توحید دعوا اولنه رق عسکرایله برابر محاکمه اولنش
 و قوانین عمومیة جزائیة توفیقاً حکم صادر اولمش ایسه بو حکمله افراددن
 اولان مظلونک حق ضایع اوله میه جففسدن یالکیز احاددن اولان مجرم لهنده
 امهال قاعده سی تطبیق اولنه بیلور .

امهال مجرمین طوغریدن طوغریه محکمه جانبدن تقدیر اولنور . حتی
 دیه بیلرلر که امهال قاعده سی ، مظلون علیک سوابق حالنه ، معیشته ، و هیئت
 اجتماعیه نظر ننده حائز اولدینی حیثیته کوره تصویب و عدم تصویب حکمک
 اجتہاد و اعتقادینه قلمش امور تقدیریه دندر . مظلون علیه بو حق کنندولکنندن
 طلب ایده مز .

اما مدعی عمومی هیئت اجتماعیه نک وکالت مخصوصه و مطلقه سی حائز
 اولدینی اجلدن مظلون علیک امهالی محکمه هیئتندن طلبه حق اوله جنی کی
 محکمه نک خود بخود تحت قراره الدینی امهال حکمی استیناف محکمه سینه
 بلمر اجمعه فسخ ایتدیره بیلور .

امهال محکمه بدایتده تحت قراره النسه ، استیناف محکمه سنده تحت قراره
 النقی حائز اولور . محکمه تمیزده بو حقک استعمال و عدم استعمالی بر درجه جای
 تر ددر . انتظام عامیه ، الفت بشریه بیه تعلق ایدن مسائی تقدیر ، مظلون علیک
 احوال روحیه سینه اطلاع و وقوف و جاهاً جریان ایدن محاکماته حاصل اولور .
 محکمه تمیز کی بر محکمه عالیه نک قوت علمی و تجربیه سی سابقده و حاضرده

نه قدر عالی اولسه بيله دائرة قضاسنده محاکمه وضعيد ايده مامسی ، و مصالح عدليه نك تنسيقنه ، تکميلنه متداثر تدقیقاتی اوراق اوزرنده اجرا ايله مامسی جهتلی بيله . مشاهده اولنان محدودیت مقیدیت قضایه بناء ظن اولنورکه امهال محکمه تمیزک صلاحیتی داخلنده دکلدر . و اويله اولمق ایجاب ایدر .

عبدالحق مدحت

- مابعدی وار -

معاهدات

هود عتیقه مزك تاريخی

۴

قرون و سطاذه اروپا دولترینك جمله سی فه نودالیه یعنی دره بلك اصولی اوزره غایت مختلف و متفرق اداره لرده بولنش و مرکز حکومت هیچ بر یرده لایق بيله کسب اهمیت ایده مامش اولدیغندن محاربات دولیه همان مفقود ایدی . غیرت دینه ايله ایدیلان اهل صلب سفرلری ؛ حقوق حکمدارینك تأییدی ایچون آلمان امپراطورلرك ایتالیا سفرلری و «سوزرن» ايله «واسال» یعنی تابع ايله مبتوع منازعه لرینك بیوک بر مقیاسده اجرا سندن عبارت اولان یوز سنه محاربه سی استنا ایدیلیرسه قرون متوسطه ده ملت لر ارسنده مهم بر محاربه کورلمز ، یالکر دره بک لر ارسنده منازعات و مناقشات داخلیه متعادییه تصادف اولنور . قرون وسطانك بوحالنه مقابل قرون جدیدده محاربات دولیه نك ظهوری احوالك ایجاب اتدن ایدی . باروت دیدیکمز ترکیب اروپاده طاینیر طانماز بونك قرال لر طرفندن انحصار صورت بيله اعمالی تحت تأمین الهرق طوپلرده استعمالی سایه سنده شاطوری یقیلوب دره بک لر پریشان ایدلمش و امنیت و راحت ممالک اعاده اولونجه داخلده مشغولیتلری قلمیان حکمدارلرك نظرلری خارجه منعطف اولمش در . دره بک لرك اصولی ابتدا فرانسه ده منتظماً يرلشدیکی کبی او اصولدن ایلک اول قوربتیلان دخی فرانسه اولمشدر .